

Dus bluesunzs sin in banc

Top Pop Rumantsch Nr. 42

■ (rtr) Il 42avel Top Pop Rumantsch è ina collavuraziun tranter duas generaziuns da chantauturs sursilvans – Luis Coray e Pascal Gamboni chantan «sen baun». RTR preschenta il nov Top Pop ils 2 da mars 2016 da las las 07.00–08.00 en il Radio Rumantsch. Tranter las 11.00 e las 12.00 èn Luis Coray e Pascal Gamboni live en il studio. *Luis Coray*, artist universal, performader, pictur e musicist, è stà in dals emprims chantauturs rumantschs sursilvans, activ dapi ils emprims onns settanta. Ma el è er in trubadur cun ina tempra bluesica detg sfranada ed anarchica, greva da metter en ils mastrins da producziuns luxuriosas. Ch'el vegn tuttina da furnir uss, cun ses passa 60 onns, in Top Pop Rumantsch, quai engrazia Coray ad ina collavuraziun cun il collega junior tuatschin *Pascal Gamboni*, quests dis qua il chantautur rumantsch il pli discutà. Ensemen han els elavurà la chanzun «sen baun», ina veglia cumposiziun da Coray, dond a

quella in ritmus poetic alert e persvadent. Per la transposiziun musicala definitiva ha dentant procurà il musicist vallesan *Michael Gertschen*, in producent ch'ha gia lavurà cun divers renumads artists svizzers. Gertschen ha rinforzà il blues basic da la chanzun, manond quella la finala en ina erupziun da jazz à la New Orleans. Ed el ha er guardà che Gamboni e Coray, dus chantadurs uschè ineguals, chattian ina vusch comunabla en quel 42avel Top Pop Rumantsch, che recloma unisono ina storia: «O pren toch giu tes peis uss dal clavazin!»

Top Pop Rumantsch è ina seria da producziuns da musica actuala, lantschada da Radiotelevision Svizra Rumantscha (RTR) l'onn 2005.

Tut ils titels da la seria èn d'udir sin la pagina d'internet dad RTR sut: www.rtr.ch/dossiers/top-pop-rumantsch. Las emprimas 30 chanzuns èn er disponibilas sin ils discs cumpacts Top Pop Rumantsch vol. 1 & 2 ch'èn da retrair tar: RTR, Via Masans 2, 7002 Cuira.